

Uchapan Pembukaan Meshuarat  
R.I.D.A. yang pertama.

Tuan Pengerusi dan tuan2 yang hadzir sekalian,

Saya amat-lah sukachita oleh sebab dapat peluang ini hadzir di-meshuarat Lembaga ini yang di-adakan bagi kali yang pertama semenjak Lembaga ini di-masokkan ka-bawah Kementerian Pembangunan Luar Bandar atau pun Ministry of Rural Development. Dan lagi saya suka mengambil peluang ini mengalu2-kan Ahli2 yang baharu di-lantek bagi Lembaga ini terutama kepada tuan Pengerusi sendiri.

Saperti tuan2 semua ketahwi Kerajaan, ia-itu Kerajaan Perikatan, telah menentukan dasar-nya bahawa dalam masa 5 tahun yang akan datang Kerajaan Perikatan akan memberi keutamaan yang tinggi sekali kepada kemajuan di-luar bandar. Dan Kerajaan akan menggunakan sepenoh2 tenaga bagi faedah penduduk2 di-luar bandar. Lembaga ini ada-lah di-kahendaki mengambil tempat yang penting bagi menjalankan dasar Kerajaan ini dan bagi mendatangkan hasil yang memberi puas hati.

Kerajaan berazam hendak menjalankan dasar ini dengan seberapa daya upaya dan Kerajaan telah menentukan ia-itu Ranchangan Pembangunan Luar Bandar ini hendak-lah di-sifatkan sebagai satu Dzarurat juga. Sebagai Dzarurat ini berma'ana dua perkara, yang pertama-nya hendak-lah semua pegawai2 Kerajaan baik pegawai2 Federal atau pun State, wakil2 ra'ayat serta seterusnya ra'ayat jelata sekalian menumpukan sepenoh2 tenaga bagi menjalankan pekerjaan ini. Yang kedua-nya dalam pekerjaan ini hendak-lah kita mendapat hasil dengan seberapa segera. Ini berma'ana, jika suatu henda hendak di-buat bagaimana chara pun mesti di-lakukan.

Ini-lah chara-nya kita berjalan pada masa melawan Penganas Communist dahulu dan begitu juga saya berharap kita akan berjalan dalam rancangan memajukan keadaan di-luar bandar. Pembangunan ini akan di-jalankan menurut kehendak dan kemahuan ra'ayat jelata dan jikalau kita putuskan suatu perkara itu mustahak di-jalankan maka dengan apa chara pun kita akan jayakan juga. Saya harap perkara ini akan di-terangkan kepada semua pegawai Lembaga ini supaya mereka semua mempunyai semangat yang baharu ini, ia-itu semangat membena dengan seberapa daya upaya. Hanya dengan tiap2 pegawai Kerajaan dan pegawai Lembaga ini mempunyai semangat yang semacam itu dapat kita laksanakan rancangan Pembangunan luar bandar ini dengan sempurna-nya.

Kerajaan telah menentukan bahawa Pekerjaan Pembangunan Luar Bandar ini hendak-lah di-jalankan dengan mengguna chara pentadbiran sama juga dengan chara pentadbiran yang di-buat bagi menghapuskan penganas Communist, ia-itu di-adakan Jawatankuasa di-perengkat national, di-perengkat negeri dan juga di-perengkat Jajahan, dan saya suka menerangkan bahawa Jawatankuasa2 telah pun di-tuboh di-serata2 perengkat itu. Pada masa ini Kerajaan Persekutuan dan juga Kerajaan Negeri sedang mengambil langkah bagi mengatur kedudukan Jawatankuasa2 Itu dan juga Pejabat2 Kerajaan yang berkaitan dengan pekerjaan Pembangunan Luar Bandar. Hendak-lah kita menyemak jentera2 pentadbiran supaya dapat pekerjaan kita di-jalankan dengan sempurna. Bagitu juga saya berharap pada Lembaga ini bagi menyemak jentera-nya supaya tiap2 pegawai dalam Lembaga ini faham dan mengetahui dengan sebenar-nya tugas dan tanggung jawab

masing2. Mustahak-lah semua pegawai bagi semua perengkat mengadakan kerjasama yang kuat dan menjalankan tujuan2 dan ranchangan kita ini dengan satu hati dan satu fahaman.

Pegawai2 Lembaga ini ada-lah di-kahendaki mengambil bahagian yang penting di-dalam ranchangan Pembangunan Luar Bandar dan di-perengkat Negeri saya telah mengambil langkah bukan sahaja meninggikan darjah setengah2 bahagian pegawai negeri itu bahkan telah memilih pegawai2 yang sebenar2-nya bersemangat dan berpengalaman bagi menjalankan pekerjaan sebagai State Development Officer dalam Negeri, di-sebabkan pegawai2 itu di-kahendakan menjalankan pekerjaan dengan sepenoh2 semangat dan tenaga. Pegawai kemajuan Negeri ada-lah di-kahendaki mempunyai dua tanggung jawab. • Satu sebagai pegawai yang bertanggung jawab terus kepada Kementerian Pembangunan Luar Bandar dan sebagai Setia Usaha Jawatankuasa Kemajuan dalam Negeri. Dan lagi ia bertanggung jawab juga kepada Lembaga ini bagi menjalankan pekerjaan2 Lembaga ini. Oleh itu kita berkahendakan orang yang benar2 mempunyai pengalaman dan kelayakan bagi menjalankan pekerjaan yang berat ini.

Baharu2 ini saya telah mengeluarkan satu perintah atau Directive kepada Lembaga ini bagi menentukan dasar perjalanan Lembaga ini yang saya perchaya tiap2 orang ahli ada mempunyai satu salinan perintah ini. Asas dan dasar perintah yang di-beri kepada Lembaga ini ia-lah di-kahendaki Lembaga ini menumpukan tenaga-nya dengan sepenoh2-nya kepada pekerjaan bagi memajukan keadaan ikhtisad di-kampong2 dengan mengutamakan ranchangan bagi mengadakan perusahaan2 kecil, ranchangan pinjaman wang dan juga ranchangan bagi

menolong orang2 kampung menjual barang2-nya atau "marketing" •

Saya tidak hendak menerangkan satu persatu perkara2 yang terkandung dalam perintah itu akan tetapi saya suka menegaskan di-sini bahawa mustahak-lah Lembaga ini menumpukan tenaga-nya yang lebeh lagi dan mendatangkan hasil yang lebeh berkesan dalam pekerjaan bagi memajukan keadaan penduduk2 di-kampong2 daripada masa yang telah lalu. Saya katakan Kerajaan sekarang berkehendakan hasil yang tegas dan nyata dengan seberapa segera yang boleh., Kampong2 di-seluruh Tanah Melayu ini mempunyai hasil2 yang banyak, maka menjadi tanggung jawab Lembaga ini bagi menggalakan segala perusahaan di-kampong2, serta di-perbaiki, di-perbesar dan di-luaskan lagi. Hendak-lah Lembaga ini memberi pertolongan kepada penduduk2 di-kampong2 supaya dapat mereka itu mengeluarkan barang2 makanan dan hasil2 yang lain yang lebeh banyak lagi, supaya tiap2 orang penduduk di-kampong2 itu dapat mempunyai mata pencharian yang tetap dan sempurna. Dengan ini dapat-lah tiap2 orang di-kampong2 itu mempunyai satu taraf hidup yang baharu yang lebeh tinggi daripada yang ada sekarang ini dan dapat-lah ia menerima sepenoh2 balasan dan hasil daripada pekerjaan dan titek peloh-nya sendiri.

Saya suka menegaskan di-sini bahawa pekerjaan memperbaiki keadaan di-kampong2 itu ada-lah satu pekerjaan yang besar dan luas yang tidak dapat di-laksanakan dengan serta merta. Oleh itu mustahak-lah kita mengatur perjalanan kita, ia-itu hendak-lah kita mulakan satu persatu supaya kita mendapat hasi dengan seberapa segera. Mustahak-lah kita sempurnakan satu